

大般若波羅蜜多經卷第四百二十五

唐三藏法師玄奘奉 詔譯

第二分帝釋品第二十五之一

爾時於此三千大千堪忍世界所有四大天王各與無量百千俱胝四大王眾天子眾俱來集會。所有天帝各與無量百千俱胝三十三天諸天子眾俱來集會。所有蘇夜摩天王各與無量百千俱胝夜摩天諸天子眾俱來集會。所有珊覩史多天王各與無量百千俱胝覩史多天諸天子眾俱來集會。所有妙變化天王各與無量百千俱胝樂變化天諸天子眾

俱來集會。所有自在天王。各與無量百千俱胝他化自在天諸天子眾俱來集會。所有大梵天王。各與無量百千俱胝諸梵天眾俱來集會。所有極光淨天。各與無量百千俱胝第二靜慮天眾俱來集會。所有遍淨天。各與無量百千俱胝第三靜慮天眾俱來集會。所有廣果天。各與無量百千俱胝第四靜慮天眾俱來集會。所有色究竟天。各與無量百千俱胝淨居天眾俱來集會。是四大王天眾乃至淨居天眾。所有淨業異熟身光。比如來身所現常光。百分不及一。千分不及一。百千分不及一。俱胝分不及一。百俱胝分不

及一。千俱胝分不及一。百千俱胝分不及一。如是乃至數分算分計分喻分乃至卽波尼殺曇分亦不及一。何以故。以如來身所現常光熾然赫奕。於諸光中最尊最勝最上最妙。無比無等無上第一。蔽諸天光皆令不現。猶如焦炷對瞻部金。爾時天帝釋白具壽善現言。今此三千大千世界所有四大王眾天。乃至淨居天皆來集會。欲聞尊者宣說般若波羅蜜多。唯願尊者知時爲說。尊者何謂菩薩摩訶薩般若波羅蜜多。云何菩薩摩訶薩應住般若波羅蜜多。云何菩薩摩訶薩應學般若波羅蜜多。時具壽善現告天帝

釋言。憍尸迦。汝等天眾。諦聽諦聽。善思念之。吾當承佛威神之力。順如來意。爲諸菩薩摩訶薩眾。宣說般若波羅蜜多。如菩薩摩訶薩。可於其中。應如是住。應如是學。憍尸迦。汝諸天等。未發無上菩提心者。今皆應發。憍尸迦。諸有已入聲聞獨覺正性離生。不復能發大菩提心。何以故。憍尸迦。彼於生死已結界故。此中若有能於無上正等菩提發心趣者。我亦隨喜。何以故。憍尸迦。諸有勝人。應求勝法。我終不障他勝善品。憍尸迦。汝問何謂菩薩摩訶薩般若波羅蜜多者。汝等諦聽。吾當爲說。憍尸迦。若菩薩摩訶薩發一切

智智相應之心。以無所得而爲方便。思惟色乃至識。若無常若苦若無我若空若如病若如癱若如箭若如瘡若熱惱若逼切若敗壞若衰朽若變動若速滅。若可畏若可厭。若有災若有橫。若有疫若有癘。若不安隱若不可依信。思惟眼界乃至意處。思惟色處乃至法處。思惟眼界乃至意界。思惟色界乃至法界。思惟眼識界乃至意識界。思惟眼觸乃至意觸。思惟眼觸爲緣所生諸受乃至意觸爲緣所生諸受。思惟地界乃至識界亦復如是。憍尸迦。是謂菩薩摩訶薩般若波羅蜜多。復次憍尸迦。若菩薩摩訶薩發一切智。

智相應之心。以無所得而爲方便。思惟色乃至識。若寂靜若遠離。若無生若無滅。若無染若無淨。若無作若無爲。思惟眼處乃至意處。思惟色處乃至法處。思惟眼界乃至意界。思惟色界乃至法界。思惟眼識界乃至意識界。思惟眼觸乃至意觸。思惟眼觸爲緣所生諸受乃至意觸爲緣所生諸受。思惟地界乃至識界亦復如是。憍尸迦。是謂菩薩摩訶薩般若波羅蜜多。復次憍尸迦。若菩薩摩訶薩發一切智智相應之心。以無所得而爲方便。思惟無明緣行。行緣識。識緣名色。名色緣六處。六處緣觸。觸緣受。受緣愛。愛緣取。

取緣有。有緣生。生緣老死。乃至純大苦蘊集。以無所得而爲方便。思惟無明滅。故行滅。行滅故識滅。識滅故名色滅。名色滅故六處滅。六處滅故觸滅。觸滅故受滅。受滅故愛滅。愛滅故取滅。取滅故有滅。有滅故生滅。生滅故老死。乃至純大苦蘊滅。憍尸迦。是謂菩薩摩訶薩般若波羅蜜多。復次憍尸迦。若菩薩摩訶薩發一切智智相應之心。以無所得而爲方便。安住內空。乃至無性自性空。安住眞如法界實際。不思議界。安隱界等。憍尸迦。是謂菩薩摩訶薩般若波羅蜜多。復次憍尸迦。若菩薩摩訶薩發一切智智相應之

心以無所得而爲方便。修行四念住乃至八聖道支。修行空解脫門無相無願解脫門。修行佛十力乃至十八佛不共法。修行一切三摩地門陀羅尼門。修行一切智道相智一切相智。憍尸迦。是謂菩薩摩訶薩般若波羅蜜多。復次憍尸迦。若菩薩摩訶薩發一切智智相應之心。以無所得而爲方便。修行布施淨戒安忍精進靜慮般若波羅蜜多。憍尸迦。是謂菩薩摩訶薩般若波羅蜜多。復次憍尸迦。若菩薩摩訶薩修行般若波羅蜜多時。作如是觀。唯有諸法互相滋潤互相增長互相圓滿。思惟校計無我我所。復作是觀。

諸菩薩摩訶薩。回向心不與菩提心和合。菩提心亦不與回向心和合。謂菩薩摩訶薩回向心。於菩提心中無所有不可得。菩提心於回向心中亦無所有不可得。諸菩薩摩訶薩。雖如實觀諸法。而於諸法都無所見。憍尸迦。是謂菩薩摩訶薩般若波羅蜜多。時天帝釋問善現言。云何菩薩摩訶薩回向心不與菩提心和合。菩提心亦不與回向心和合。云何菩薩摩訶薩回向心。於菩提心中無所有不可得。菩提心於回向心中亦無所有不可得。善現荅言。憍尸迦。諸菩薩摩訶薩回向心則非心。菩提心亦非心。不應非心回

向非心。心亦不應回向非心。非心不應回向於心。心亦不應回向於心。何以故。憍尸迦。非心卽是不可思議。不可思議卽是非心。如是二種俱無所有。無所有中無回向義。憍尸迦。心無自性。心性無故。心所亦無。心及心所。旣無自性故。心亦無回向心義。憍尸迦。若作是觀。是謂菩薩摩訶薩般若波羅蜜多。爾時世尊讚善現曰。善哉善哉。汝善能爲諸菩薩摩訶薩宣說般若波羅蜜多。亦善勸勵諸菩薩摩訶薩。令生歡喜。勸修般若波羅蜜多。具壽善現白言。世尊。我旣知恩不應不報。何以故。過去如來應正等覺。及諸弟子爲

諸菩薩摩訶薩眾。宣說六種波羅蜜多。示現教導讚
勵慶喜。安撫建立。令得究竟。世尊爾時亦在中學。今
證無上正等菩提。轉妙法輪。利樂我等。故我今者。應
隨佛教。爲諸菩薩摩訶薩眾。宣說六種波羅蜜多。示
現教導讚勵慶喜。安撫建立。令得究竟。疾證無上正
等菩提。是則名爲報彼恩德。爾時具壽善現。告天帝
釋言。憍尸迦。汝問云何菩薩摩訶薩應住般若波羅
蜜多者。汝等諦聽。吾當爲說。諸菩薩摩訶薩於般若
波羅蜜多。如所應住。不應住相。憍尸迦。色空。受想
行識。受想行識空。菩薩。菩薩空。若色空。若受想行識

空。若菩薩空。如是一切皆無二無二處。憍尸迦。諸菩薩摩訶薩。於般若波羅蜜多。應如是住。憍尸迦。眼處。眼處空。乃至意處。意處空。菩薩。菩薩空。若眼處空。乃至若意處空。若菩薩空。如是一切皆無二無二處。憍尸迦。諸菩薩摩訶薩。於般若波羅蜜多。應如是住。憍尸迦。色處。色處空。乃至法處。法處空。菩薩。菩薩空。若色處空。乃至若法處空。若菩薩空。如是一切皆無二無二處。憍尸迦。諸菩薩摩訶薩。於般若波羅蜜多。應如是住。憍尸迦。眼界。眼界空。乃至眼界。眼界空。菩薩。菩薩空。若眼界空。乃至若眼界空。若菩薩空。如是一

切皆無二無二處。憍尸迦。諸菩薩摩訶薩於般若波羅蜜多。應如是住。憍尸迦。色界空。乃至法界法界空。菩薩菩薩空。若色界空。乃至若法界空。若菩薩空。如是一切皆無二無二處。憍尸迦。諸菩薩摩訶薩於般若波羅蜜多。應如是住。憍尸迦。眼識界。眼識界空。乃至若意識界。意識界空。菩薩菩薩空。若眼識界空。乃至若意識界空。若菩薩空。如是一切皆無二無二處。憍尸迦。諸菩薩摩訶薩於般若波羅蜜多。應如是住。憍尸迦。眼觸。眼觸空。乃至意觸。意觸空。菩薩菩薩空。若眼觸空。乃至若意觸空。若菩薩空。如是一切皆

無二無二處。憍尸迦。諸菩薩摩訶薩於般若波羅蜜多。應如是住。憍尸迦。眼觸爲緣所生諸受。眼觸爲緣所生諸受空。乃至意觸爲緣所生諸受。意觸爲緣所生諸受空。菩薩。菩薩空。若眼觸爲緣所生諸受空。乃至若意觸爲緣所生諸受空。若菩薩空。如是一切皆無二無二處。憍尸迦。諸菩薩摩訶薩於般若波羅蜜多。應如是住。憍尸迦。地界。地界空。乃至識界。識界空。菩薩。菩薩空。若地界空。乃至若識界空。若菩薩空。如是一切皆無二無二處。憍尸迦。諸菩薩摩訶薩於般若波羅蜜多。應如是住。憍尸迦。無明。無明空。乃至老

死。老死空。菩薩。菩薩空。若無明空。乃至若老死空。若菩薩空。如是一切皆無二無二處。憍尸迦。諸菩薩摩訶薩。於般若波羅蜜多。應如是住。憍尸迦。無明滅。無明滅空。乃至老死滅。老死滅空。菩薩。菩薩空。若無明滅空。乃至若老死滅空。若菩薩空。如是一切皆無二無二處。憍尸迦。諸菩薩摩訶薩。於般若波羅蜜多。應如是住。憍尸迦。布施波羅蜜多。布施波羅蜜多空。乃至般若波羅蜜多。般若波羅蜜多空。菩薩。菩薩空。若布施波羅蜜多空。乃至若般若波羅蜜多空。若菩薩空。如是一切皆無二無二處。憍尸迦。諸菩薩摩訶薩。

於般若波羅蜜多。應如是住。憍尸迦。內空。內空空。乃至無性自性空。無性自性空空。菩薩。菩薩空。若內空空。乃至若無性自性空空。若菩薩空。如是一切皆無二。無二處。憍尸迦。諸菩薩摩訶薩。於般若波羅蜜多。應如是住。憍尸迦。四念住。四念住空。乃至十八佛不共法。十八佛不共法空。菩薩。菩薩空。若四念住空。乃至若十八佛不共法空。若菩薩空。如是一切皆無二。無二處。憍尸迦。諸菩薩摩訶薩。於般若波羅蜜多。應如是住。憍尸迦。一切三摩地門。一切三摩地門空。一切陀羅尼門。一切陀羅尼門空。菩薩。菩薩空。若一切

三摩地門空。若一切陀羅尼門空。若菩薩空。如是一切皆無。二無二處。憍尸迦。諸菩薩摩訶薩。於般若波羅蜜多。應如是住。憍尸迦。聲聞乘。聲聞乘空。獨覺乘。無上乘。獨覺乘。無上乘空。菩薩。菩薩空。若聲聞乘空。若獨覺乘。無上乘空。若菩薩空。如是一切皆無。二無二處。憍尸迦。諸菩薩摩訶薩。於般若波羅蜜多。應如是住。憍尸迦。預流。預流空。乃至如來。如來空。菩薩。菩薩空。若預流空。乃至若如來空。若菩薩空。如是一切皆無。二無二處。憍尸迦。諸菩薩摩訶薩。於般若波羅蜜多。應如是住。憍尸迦。一切智。一切智空。道相智。一

切相智。道相智。一切相智。空。菩薩。菩薩。空。若一切智。空。若道相智。一切相智。空。若菩薩。空。如是一切皆無。二無二處。憍尸迦。諸菩薩摩訶薩。於般若波羅蜜多。應如是住。時天帝釋。問善現。言云何菩薩摩訶薩。修行般若波羅蜜多時。所不應住。善現。答言。憍尸迦。諸菩薩摩訶薩。修行般若波羅蜜多時。不應住色。不應住受。想。行。識。不應住眼處。乃至不應住意處。不應住色處。乃至不應住法處。不應住眼界。乃至不應住意識界。乃至不應住色界。乃至不應住法界。不應住眼識界。乃至不應住意識界。乃至不應住眼觸。乃至不應住意觸。不

應住眼觸爲緣所生諸受。乃至不應住意觸爲緣所生諸受。不應住地界。乃至不應住識界。不應住無明。乃至不應住老死。不應住無明滅。乃至不應住老死滅。不應住布施波羅蜜多。乃至不應住般若波羅蜜多。不應住內空。乃至不應住無性自性空。不應住四念住。乃至不應住十八不共法。不應住一切三摩地門。不應住一切陀羅尼門。不應住聲聞乘。不應住獨覺乘。無上乘。不應住預流。乃至不應住如來。不應住一切智。不應住道相智。一切相智。何以故。憍尸迦。如是住者有所得故。復次憍尸迦。諸菩薩摩訶薩修

行般若波羅蜜多時。不應住此是色。乃至此是識。不
應住此是眼處。乃至此是意處。不應住此是色處。乃
至此是法處。不應住此是眼界。乃至此是眼界。不應
住此是色界。乃至此是法界。不應住此是眼識界。乃
至此是意識界。不應住此是眼觸。乃至此是意觸。不
應住此是眼觸爲緣所生諸受。乃至此是意觸爲緣
所生諸受。不應住此是地界。乃至此是識界。不應住
此是無明。乃至此是老死。不應住此是無明滅。乃至
此是老死滅。不應住此是布施波羅蜜多。乃至此是
般若波羅蜜多。不應住此是內空。乃至此是無性自

性空。不應住此。是四念住。乃至此。是十八不共法。不應住此。是一切三摩地門。此是一切陀羅尼門。不應住此。是聲聞乘。此是獨覺乘。無上乘。不應住此。是預流。乃至此。是如來。不應住此。是一切智。此是道相智。一切相智。何以故。憍尸迦。如是住者。有所得故。復次。憍尸迦。諸菩薩摩訶薩。修行般若波羅蜜多時。不應住色。乃至識。若常若無常。若樂若苦。若我若無我。若淨若不淨。若空若不空。若寂靜若不寂靜。若遠離若不遠離。不應住眼處。乃至意處。若常若無常。乃至若遠離若不遠離。不應住色處。乃至法處。若常若無

常。乃至若遠離若不遠離。不應住眼界乃至意識界。若常若無常。乃至若遠離若不遠離。不應住色界乃至法界。若常若無常。乃至若遠離若不遠離。不應住眼識界乃至意識界。若常若無常。乃至若遠離若不遠離。不應住眼觸乃至意觸。若常若無常。乃至若遠離若不遠離。不應住眼觸爲緣所生諸受乃至意觸爲緣所生諸受。若常若無常。乃至若遠離若不遠離。不應住地界乃至識界。若常若無常。乃至若遠離若不遠離。不應住無明乃至老死。若常若無常。乃至若遠離若不遠離。不應住無明滅乃至老死滅。若常若無

常乃至若遠離若不遠離。不應住布施波羅蜜多。乃至般若波羅蜜多。若常若無常。乃至若遠離若不遠離。不應住內空乃至無性自性空。若常若無常。乃至若遠離若不遠離。不應住四念住乃至十八不共法。若常若無常。乃至若遠離若不遠離。不應住一切三摩地門一切陀羅尼門。若常若無常。乃至若遠離若不遠離。不應住聲聞乘獨覺乘無上乘。若常若無常。乃至若遠離若不遠離。不應住預流乃至如來。若常若無常。乃至若遠離若不遠離。不應住一切智道相智一切相智。若常若無常。乃至若遠離若不遠離。

何以故。憍尸迦。如是住者有所得故。復次憍尸迦。諸菩薩摩訶薩修行般若波羅蜜多時。不應住預流果。若有爲所顯。若無爲所顯。不應住一來不還阿羅漢。獨覺菩提。諸佛無上正等菩提。若有爲所顯。若無爲所顯。何以故。憍尸迦。如是住者有所得故。復次憍尸迦。諸菩薩摩訶薩修行般若波羅蜜多時。不應住預流。是福田。不應住一來不還阿羅漢。獨覺菩薩。如來是福田。何以故。憍尸迦。如是住者有所得故。復次憍尸迦。諸菩薩摩訶薩修行般若波羅蜜多時。不應住初地。乃至不應住第十地。何以故。憍尸迦。如是住

者有所得故。所以者何。如是住者有動轉故。復次。憍尸迦。諸菩薩摩訶薩。修行般若波羅蜜多時。不應住初發心已。便作是念。我當圓滿布施波羅蜜多。乃至般若波羅蜜多。不應住初發心已。便作是念。我當修行四念住。乃至八聖道支。不應住初發心已。便作是念。我當修行空無相無願解脫門。乃至十八不共法。不應住作是念。我修加行。既圓滿已。當入菩薩正性離生。不應住作是念。我已得入正性離生。當住菩薩不退轉地。不應住作是念。我當圓滿菩薩五通。不應住作是念。我住菩薩圓滿五通。常遊無量無數佛。

土禮敬瞻仰供養承事諸佛世尊。聽聞正法如理思惟。廣爲他說。何以故。橋尸迦。如是住者。有所得故。復次。橋尸迦。諸菩薩摩訶薩。修行般若波羅蜜多時。不應住作是念。我當嚴淨如十方佛所居淨土。不應住作是念。我當化作如十方佛所居淨土。不應住作是念。我當成熟諸有情類。令證無上正等菩提。或般涅槃。或人天樂。不應住作是念。我當往詣無量無數諸佛國土。供養恭敬尊重讚歎諸佛世尊。復以無邊華香瓔珞寶幢旛蓋衣服臥具飲食燈明。百千俱胝那庾多數天諸伎樂。及無量種上妙珍財。而爲供養。不

應住作是念我當安立無量無數無邊有情。令於無上正等菩提得不退轉。何以故。憍尸迦。如是住者有所得故。復次憍尸迦。諸菩薩摩訶薩修行般若波羅蜜多時。不應住作是念我當成辦清淨肉眼天眼慧眼法眼佛眼。不應住作是念我當成辦諸等持門。於諸等持自在遊戲。不應住作是念我當成辦諸總持門。於諸總持皆得自在。不應住作是念我當成辦如來十力。四無所畏。四無礙解。大慈大悲大喜大捨十八佛不共法。不應住作是念我當成辦三十二相八十隨好。所莊嚴身。令諸有情見者歡喜觀無厭倦。由

斯證得利益安樂。何以故。憍尸迦。如是住者有所得。故。復次。憍尸迦。諸菩薩摩訶薩修行般若波羅蜜多時。不應住。此是第八補特伽羅。此是隨信行。此是隨法行。不應住。此是預流。極七返有。此是家家。此是一閒。不應住。此是齊首補特伽羅。乃至壽盡煩惱方盡。不應住。此是預流定不墮法。此是一來。至此世間得盡苦際。不應住。此是不還向。此是不還果。往彼方得般涅槃者。不應住。此是阿羅漢。永盡後有。現在必入無餘涅槃。不應住。此是獨覺。不應住。此是如來。應正等覺。不應住。作是念。我超聲聞獨覺地。已住菩薩地。

不應住作是念。我當具足一切智道相智一切相智。覺一切法一切相已。永斷一切煩惱纏結習氣相續。不應住作是念。我當證得所求無上正等菩提。得成如來應正等覺。轉妙法輪。作諸佛事。度脫無量無數有情。令得涅槃。畢竟安樂。不應住作是念。我當善修四神足。已安住如是殊勝等持。由此等持。增上勢力。令我壽命如殑伽沙大劫而住。不應住作是念。我當獲得壽量無邊。不應住作是念。我當成就三十二相。是一一相百福莊嚴。不應住作是念。我當成就八十隨好。是一一好有無數量。希有勝事。不應住作是念。

我當安住一嚴淨土。其土寬廣於十方面。如苑伽沙世界之量。不應住作是念。我當安坐一金剛座。其座廣大量等三千大千世界。不應住作是念。我當居止大菩提樹。其樹高廣眾寶莊嚴。所出妙香。有情聞者。貪瞋癡等心疾皆除。無量無邊身病亦愈。諸有聞此菩提樹香。離諸聲聞獨覺作意。必獲無上正等菩提。不應住作是念。願我當得嚴淨佛土。其土清淨。無色蘊名聲。無受想行識蘊名聲。無眼處名聲。無耳鼻舌身意處名聲。無色處名聲。無聲香味觸法處名聲。無眼界名聲。無耳鼻舌身意界名聲。無色界名聲。無聲

香味觸法界名聲。無眼識界名聲。無耳鼻舌身意識界名聲。無眼觸名聲。無耳鼻舌身意觸名聲。無眼觸爲緣所生諸受名聲。無耳鼻舌身意觸爲緣所生諸受名聲。無地界名聲。無水火風空識界名聲。無無明名聲。無行識名色六處觸受愛取有生老死名聲。唯有布施波羅蜜多名聲。乃至唯有般若波羅蜜多名聲。唯有內空名聲。乃至唯有無性自性空名聲。唯有眞如名聲。乃至唯有不思議界名聲。唯有四念住名聲。廣說乃至唯有十八佛不共法名聲。其中都無預流一來不還阿羅漢獨覺異生等名聲。唯有菩薩摩

訶薩如來應正等覺等名聲。何以故。憍尸迦。如是住者有所得故。所以者何。一切如來應正等覺證得無上正等菩提時。覺一切法都無所有。一切菩薩摩訶薩眾。住不退轉地時。亦見諸法都無所有。憍尸迦。是爲菩薩摩訶薩於般若波羅蜜多。如所應住。不應住相。憍尸迦。諸菩薩摩訶薩於深般若波羅蜜多。隨所應住。不應住相。以無所得而爲方便。應如是學。爾時舍利子。作是念言。若菩薩摩訶薩修行般若波羅蜜多時。於一切法不應住者。云何應住般若波羅蜜多。具壽善現。知舍利子心之所念。便謂之曰。於意云何。

諸如來心爲何所住。舍利子言。諸如來心都無所住。所以者何。善現。如來之心不住色。不住受。想行識。不住眼處。不住耳鼻舌身意處。不住色處。不住聲香味觸法處。不住眼界。不住耳鼻舌身意界。不住色界。不住聲香味觸法界。不住眼識界。不住耳鼻舌身意識界。不住眼觸。不住耳鼻舌身意觸。不住眼觸爲緣所生諸受。不住耳鼻舌身意觸爲緣所生諸受。不住有爲界。不住無爲界。不住四念住。廣說乃至不住十八佛不共法。不住一切智。不住道相智。一切相智。何以故。以一切法不可得故。如是善現。如來之心於一切

法都無所住亦非不住。時具壽善現。謂舍利子言。諸菩薩摩訶薩修行般若波羅蜜多時。亦復如是。雖住般若波羅蜜多。而同如來於一切法都無所住。亦非不住。所以者何。舍利子。諸菩薩摩訶薩修行般若波羅蜜多時。雖住般若波羅蜜多。而於色非住非不住。乃至於一切相智亦非住非不住。何以故。舍利子。以色等法無二相故。舍利子。諸菩薩摩訶薩於深般若波羅蜜多。隨此非住非不住相。以無所得而爲方便。應如是學。爾時會中有諸天子竊作是念。諸藥叉等言詞呪句。雖復隱密。而我等輩猶可了知。尊者善現。

於此般若波羅蜜多。雖以種種言詞顯示。而我等輩。竟不能解。具壽善現。知諸天子心之所念。便告彼言。汝等天子。於我所說。不能解耶。諸天子言。如是如是。具壽善現。復告彼言。我曾於此甚深般若波羅蜜多。相應義中。不說一字。汝亦不聞。當何所解。何以故。諸天子。甚深般若波羅蜜多。相應義中。文字言說。皆遠離故。由此於中說者。聽者。及能解者。皆不可得。一切如來。應正等覺。所證無上正等菩提。微妙甚深。亦復如是。諸天子。如諸如來。應正等覺。化作化身。如是化身。化作四眾。俱來集會。而爲說法。於意云何。是中有

實能說能聽能解者不。諸天子言不也。大德善現告言。如是諸天子。一切法皆如化故。今於此甚深般若波羅蜜多相應義中。說者聽者及能解者都不可得。諸天子。如人夢中。夢見有佛爲諸大眾宣說正法。於意云何。是有實能說能聽能解者不。諸天子言不也。大德善現告言。如是諸天子。一切法皆如夢故。今於此甚深般若波羅蜜多相應義中。說者聽者及能解者都不可得。諸天子。如有二人處一山谷。各住一面。讚佛法僧。俱時發響。於意云何。此二響聲能互相聞互相解不。諸天子言不也。大德善現告言。如是諸

天子一切法皆如響故。今於此甚深般若波羅蜜多相應義中說者聽者及能解者都不可得。諸天子如巧幻師或彼弟子於四衢道幻作四眾及一如來應正等覺。是幻如來應正等覺爲幻四眾宣說正法。於意云何。是有實說者聽者能解者不。諸天子言不也。大德善現告言。如是諸天子一切法皆如幻故。今於此甚深般若波羅蜜多相應義中說者聽者及能解者都不可得。諸天子由此因緣我曾於此甚深般若波羅蜜多相應義中不說一字。汝亦不聞。當何所解。

大般若波羅蜜多經卷第四百二十五

音釋

俱胝

梵語也此云百億胝張尼切

珊覩史多

梵語也亦云兜率陀此云知足珊音

山 鄔波尼殺曇

梵語也此謂數之極鄔安古切曇徒南切

焦炷

焦音焦炷音注

焦炷謂焦灼燈炷也

癰

於容也癰音例疾

讚勵

讚則旰切稱美也勵音例

勉勵也

殍伽

梵語也此云天堂來河名也以從高處來故殍其拯其陵二切伽求迦切